
БОЗОРДАГИ ТАЪМИНОТ НАЗОРАТДА: ХАВОТИРГА АСОС ЙЎҚ

Фарғона вилоятида карантин даврида аҳолини озиқ-овқат маҳсулотлари билан узлуксиз таъминлаш, уларнинг нарх-навоси асоссиз ошириб юборилиши олдини олиш борасида доимий назорат йўлга қўйилган. Бу борада юртдошларимизни хавотирланиши ва ваҳимага тушишига ҳожат йўқ.

Икки кун мобайнида вилоятдаги олтита сектор раҳбарлари ўзлари масъул бўлган ҳудудларда бўлиб, бозорлардаги таъминотни ўрганди ҳамда уларда аниқланган камчиликларни бартараф этиш чоралари кўрилди. Юртимизга короновирус пандемияси кириб келгани хусусида хабар тарқалгач, аҳоли озиқ-овқат маҳсулотларини шошилиш сотиб олишга киришди. Дастлаб баъзи ҳудудларда картошка тақчиллиги юзага келгани, айрим маҳсулотларнинг нархи ошиши ҳолати ҳам кузатилди. Аммо бу каби камчиликлар масъул идоралар томонидан назоратга олиниб, қисқа фурсат ичида барчаси изига солинди.

Вилоят ҳокимлиги томонидан бу борада аниқ чора-тадбирлар ишлаб чиқилган бўлиб, бугунги кунда шаҳар ва туманлардаги 24 та деҳқон бозорларида арзонлаштирилган маҳсулотлар ярмаркаларининг фаолияти йўлга қўйилган. Қўқон шаҳридаги марказий деҳқон бозорида бўлганимизда аҳолининг кундалик эҳтиёжи учун зарур бўлган маҳсулотлар арзон нархларда сотилаётганининг гувоҳи бўлдик. Маълум бўлишича, бу ерда 120 тонна картошка, 200 тонна сабзи, 60 тонна пиёз захира қилинди. Бир килограм картошка 3 минг 500 сўмдан сотилмоқда.

-Рўзғор учун керакли маҳсулотларни харид қилдим, нархи ҳам арзон -дейди Қўқон шаҳрида яшовчи Азизбек Раҳмонов.-Расталарда ҳамма нарса бор.

Бешариқ туманидаги деҳқон бозорида ҳам барча маҳсулотлар узлуксиз таъминланяпти. Қирғизистон ва Тошкент шаҳридан 26 тонна картошка олиб келиниб, ҳар куни сотувга чиқариляпти. Сабзи, пиёз каби маҳсулотлар ортиғи билан захира қилинган. Данғара, Фурқат, Ўзбекистон, Бувайда ва бошқа туманларда ҳам шу каби ишлар амалга оширилмоқда.

Вилоятдаги барча бозорларда онлайн буюртмалар олиб етказиб бериш хизмати ташкил этилган бўлиб, уйдан чиқа олмайдиган фуқаролар учун зарур маҳсулотлар таъминланяпти.

Фарғона ва Марғилон шаҳарларидаги деҳқон бозорларида ҳам шу каби ишлар олиб бориляпти. Айни дамда бу бозорларга катта миқдорда картошка келтирилиб, захира қилиб қўйилди.

Фарғона вилояти ҳокимлиги Ахборот хизмати

Facebook, Telegram, Веб сайт, YouTube

2020-03-30 16:44:43